

Mengangkat Institusi DiRaja Dalam Memupuk Hubungan Antarabangsa Yang Akrab

3 Nov. 2007, New Sabah Times, ms. 8
Oleh Jakaria Dasan

“Tegak istana kerana sendi, Tinggi nama kerana budi.”

Bagi masyarakat Malaysia yang tinggal di Sabah, kesempatan mengikuti Majlis Konvokesyen Komemoratif DiRaja yang berlangsung pada 25 Oktober 2007 di Dewan Canselor pastinya merupakan suatu pengalaman yang agak lain dari kebiasaannya dengan Konvokesyen yang pernah mereka hadiri sebelum ini. Sebelum ini Dewan Canselor yang boleh dipenuhi oleh ribuan orang hanya dipenuhi bilamana konvokesyen meraihkan ribuan pelajar (jumlah yang sama). Tetapi pada kali ini, segenap ruang tempat duduk telah dipenuhi untuk menyaksikan dan merasai sendiri suasana dan perasaan yang terbit pada Majlis Konvokesyen Kebawah Duli Yang Maha Mulia Al-Sultan Kelantan Darulnaim, Tuanku Ismail Petra Ibni Almarhum Sultan Yahya Petra.

Dengan sokongan dan kerjasama yang diberikan oleh semua pihak kepada UMS khususnya pihak Istana Negeri Kelantan maka Majlis tersebut berlaku dengan lancar dan sempurna. Pada masa yang sama sokongan pihak Istana Negeri Sabah, Jabatan Ketua Menteri, Jabatan dan Agensi Kerajaan Negeri Sabah, Kelantan dan Persekutuan di Sabah, malah warga kelantan di Sabah, telah membolehkan Dewan Canselor UMS menyaksikan kehadiran lebih 4,000 orang pada hari tersebut. Perancangan dan persiapan yang cukup rapi meliputi susunatur Dewan, hiasan dalaman dan lanskap luaran serta pementasan acara telah digabung dengan kemas dan rapi. Malah kelangsungan Majlis itu telah dimeriahkan lagi dengan penganjuran pesta “Kelantan Fest, Kelantan

Best.” Pendekkata, kesemua aspek ini telah menjadikan Dewan Canselor pada hari itu bak sebuah Istana dimana berlangsungnya suatu acara Raja-Raja (Sultan) yang gilang gemilang.

Zahirnya, Konvokesyen Komemoratif DiRaja, Universiti Malaysia Sabah itu adalah suatu **manifestasi Universiti Malaysia Sabah dalam memperkembangkan mesej bahawa universiti itu adalah milik bersama segenap lapisan masyarakat**. Konvokesyen itu juga berperanan merintis usaha memakmurkan universiti dengan pelbagai acara melibatkan pemimpin dan masyarakat umumnya. Bilamana ianya berupaya merapatkan hubungan antara universiti dan rakyat.

Universiti Malaysia Sabah komited dan sentiasa gigih memperjuangkan konsep **“Universiti Rakyat”** dalam usahanya mendekatkan masyarakat dengan **Kota Ilmu**. Selain mempastikan kualiti pengajaran dan pembelajaran, dan pembangunan R&D dan Inovasi yang sentiasa dipertingkatkan, UMS turut berinisiatif dalam melibatkan diri dengan pelbagai aktiviti kemasyarakatan baik di dalam mahu pun di luar kampus. Sehubungan itu pemilihan tokoh bagi menerima Ijazah Kehormat adalah salah **satu daripada pendekatan “Universiti Rakyat” oleh UMS** dimana tokoh terpilih adalah dari segenap lapisan masyarakat, yang telah dikenalpasti mempunyai peranan dan sumbangan yang signifikan kepada rakyat secara keseluruhannya. Malah peranan dan sumbangan itu dilihat dari aspek yang melangkuhi negeri dan negara.

Sehingga kini Universiti Malaysia Sabah telah memberi pengiktirafan ini kepada 12 tokoh dari dalam dan luar negara. Individu-individu ini telah menabur bakti yang cukup terbilang samada menerusi kepimpinan politik, ekonomi mahu pun sosial. **UMS bangga mengaitkan dirinya**



dengan nama yang termasyhur, setelah melakukan kajian yang dikupas secara ilmiah dengan cukup mendalam dan teliti. Justeru itu, tarikh 25 Oktober 2007 bersamaan 13 Syawal 1428 Hijriah, UMS sekali lagi dengan **penuh rasa bangga**, menukilkan hari yang cukup bersejarah dengan pengijazahan Doktor Falsafah dalam bidang Hubungan Antarabangsa kepada Kebawah Duli Yang Maha Mulia Al-Sultan dan Yang DiPertuan Negeri Kelantan Darul Naim, Tuanku Ismail Petra Ibni Almarhum Sultan Yahya Petra.

UMS mempunyai **niat untuk terus** menonjolkan kepada seluruh rakyat akan pentingnya usaha-usaha memelihara keharmonian dan kestabilan serantau, sepetimana yang telah dilaksanakan oleh Kebawah Duli Yang Maha Mulia Tuanku Al-Sultan. Kebawah Duli Yang Maha Mulia Sultan Ismail Petra telah diputerakan pada 11 November 1949 di Istana Jahar, Kota Bharu, Kelantan. Baginda ialah putera bongsu dan putera tunggal Al-Marhum Duli Yang Maha Mulia Sultan Yahya Petra dan Duli Yang Maha Mulia Raja Perempuan Zainab II (2). Kebawah Duli Yang Maha Mulia Tuanku Ismail Petra telah dilantik dan diisytiharkan sebagai Sultan Kelantan yang ke-28, pada 29 Mac 1979, selepas kemangkatan Al-Marhum Seri Paduka Baginda Sultan Yahya Petra.


Sebagai putera tunggal pewaris takhta, baginda Al-Sultan sejak kecil diasuh dan dididik dalam lingkungan istana dengan menekankan tatacara adat budaya Melayu bagi mempersiapkan baginda untuk mengambil alih takhta bila tiba masanya. Justeru, baginda Al Sultan sangat dititiberatkan dengan ajaran agama, serta adat dan budaya Melayu. Semenjak kecil, bakat kepimpinan baginda Al-Sultan terserlah dengan menunjukkan ketokohan, mempermerkan keserasian dan menjalin kemesraan yang tidak berbelah bagi dengan rakyat jelata. Keperibadian dan kewibawaan Baginda yang terpuji amat

disenangi rakyat jelata. Kesanggupan Baginda Al-Sultan mencemar duli untuk bersama-sama dengan rakyat jelata dalam setiap aktiviti rakyat, menambah penghormatan dan memuncak kedaulatan. Sesuai benarlah ungkapan yang menyatakan Rakyat dan Raja berpisah tiada, “*di kasih di desa, dimuliakan di kota.*”

Pelaksanaan Projek DiRaja Kelantan, merupakan hasil kesinambungan daripada interaksi berterusan antara institusi diraja Kelantan dan negara Thailand, yang telah lama berakar umbi. **Usaha** berterusan Kebawah Duli Yang Maha Mulia Tuanku ini telah berjaya merapatkan dan memperkasa lagi hubungan diplomatik yang menjadi tradisi diraja antara negeri Kelantan dan negara Thailand, secara tidak langsung hubungan rapat institusi diRaja ini telah memberikan impak yang sangat positif, kepada rakyat kedua-dua buah negara Malaysia dan Thailand.

Sejarah telah merakamkan bahawa raja-raja Melayu terdahulu, menjalin hubungan diplomatik dengan pelbagai negara di luar jajahan mereka. Kini, hubungan diplomatik negara adalah berdasarkan faktor yang berbeza. Pada ketika institusi monarki hanya dilihat sebagai ‘pelengkap’ kepada kerajaan demokrasi, yang ditubuhkan oleh sesebuah negara dalam sistem politik antarabangsa moden, Institusi diraja Kelantan, khususnya Kebawah Duli Yang Maha Mulia Tuanku Ismail Petra telah memainkan peranan yang lebih penting dalam memartabatkan warisan monarki di Malaysia. Baginda peka dengan situasi semasa, memahami aspirasi, misi dan hala tuju negara, dalam menjalin hubungan lebih erat dengan negara jiran.

Berdasarkan kepada interaksi diraja Kelantan-Thailand yang telah bermula sejak awal kurun ke-19 lagi, Baginda terus memelihara dan mempertingkatkan hubungan yang sedia ada. Tiada siapa dapat menafikan kemantapan falsafah Melayu,



“seikat bak sirih, serumpun bak serai” inilah keunikan bangsa Melayu. Hari ini, cuma sempadan geografi yang memisahkan bangsa Melayu yang bertaburan di seluruh Kepulauan Melayu(*Malay Archipelago*).

Ikatan warisan sejarah bangsa Melayu dikongsi bersama sejak ratusan tahun dulu sama ada Melayu itu bermastautin di Thailand, Singapura, Indonesia, Brunei dan Malaysia. Ianya masih terus terjalin selaras dengan ikatan serumpun-sebangsa, bahawa Melayu itu berumpun dan bersaudara; tanpa ada sempadan yang memisahkannya. Berpaksikan kepada teras persamaan adat dan budaya, bertutur dalam lenggok bahasa Melayu serta diikat dengan agama Islam, telah menjadikan hubungan antarabangsa masyarakat Melayu tanpa batas sempadan.

Sehubungan itu, Projek DiRaja Kelantan telah dilancarkan pada tahun 2001 di negeri Kelantan. Usaha ini adalah kesinambungan kepada amalan yang telah diperakitkan oleh Institusi diraja Thailand. Pada masa yang sama, ianya berupaya membantu meredakan konflik permasalahan yang berlaku di selatan Thailand. Bersesuaian dengan kedudukan negeri Kelantan yang berjiran dengan masyarakat Melayu di Selatan Thailand, maka sudah tentu langkah proaktif perlu dimainkan bersama, dalam memulihara kestabilan yang sekian lama wujud.

Sesuatu yang amat menarik mengenai interaksi institusi diraja Kelantan dan Thailand dalam konteks hubungan antarabangsa ialah ikatan hubungan itu telah menzahirkan suatu bentuk hubungan serantau yakni antara negara yang lebih padu dan erat sebagaimana berdasarkan kepada perspektif negeri (Kelantan) dan negara (Thailand). Dengan demikian, ia boleh dihubungkan dengan usaha beberapa buah negeri di Malaysia lainnya yang bersempadan dengan beberapa buah negara (dengan menggunakan pendekatan

yang agak berbeza selain daripada peranan institusi monarki) seperti Johor-Singapura, Perlis-Thailand, Sarawak-Indonesia dan khasnya Negeri Sabah “Negeri Di Bawah Bayu” yang berjiran dengan Republik Filipina, Kalimantan, Indonesia dan negara Brunei Darussalam.

“Kalau asal nama yang baik,Seribu tahun dikenang orang.”

Falsafah tradisi yang terungkap dalam pepatah melayu lama ini memperihalkan betapa pentingnya peninggalan nama yang baik bagi seseorang individu, khususnya kalangan pemimpin. Dalam konteks yang lebih tepat, legasi sebuah nama itu adalah berkait rapat dengan khidmat bakti cemerlang dan susur galur gemilang suatu perjuangan mempertahankan kepentingan umum, yakni masyarakat dan rakyat keseluruhannya. Atas asas inilah, Universiti Malaysia Sabah yang gigih memperjuangkan konsep “Universiti Rakyat” berusaha mengenalpasti dan seterusnya mengambil langkah proaktif memahat nama watak-watak kepimpinan terbilang di puncak menara gading.

Sesungguhnya penyampaian Ijazah Kehormat adalah bersandarkan kepada realiti yang berlaku yang mengisahkan semula akan keunggulan seseorang tokoh itu yang terbukti cukup sentimental dan instrumental dalam membawa kegemilangan kepada komuniti sehingga merentas negeri dan negara. Sehingga kini Universiti Malaysia Sabah telah merealisasikan pengiktirafan ini kepada 12 tokoh tempatan dan antarabangsa Ijazah Kehormat Doktor Falsafah (10) dan Ijazah Kehormat Sastera (2). Individu-individu ini telah menabur bakti yang cukup terbilang samada menerusi kepimpinan politik, ekonomi maupun sosial.

UMS bukan sekadar mengaitkan nama yang termashyur, malah UMS mempunyai asas yang cukup tinggi yang telah dikaji dengan cukup teliti dengan mendapati



bahawa Kebawah Duli Yang Maha Mulia Tuanku Ismail Petra Ibni Al-marhum Sultan Yahya Petra, Al-Sultan Kelantan Darul Naim yang disanjung dan dikasihi, berupaya memainkan peranan penting dalam memelihara kestabilan politik, ekonomi dan sosial menerusi hubungan diplomatik yang akrab khususnya dengan negara Thailand.

Penubuhan dan seterusnya pembangunan **Kota Ilmu (UMS)**, di kawasan Bandaraya Kota Kinabalu bukan sahaja telah menambahserikan lagi lanskap Bandaraya Ibu Negeri Sabah ini. Jumlah graduannya yang hampir mencecah ke angka 14,000 orang telah berkhidmat dalam pelbagai perkhidmatan kerajaan, swasta, malah membina kejayaan menerusi bidang keusahawanan. Alumni inilah yang secara tidak langsung akan membantu meningkatkan lagi kredibiliti dan kemampuan sesebuah universiti untuk terus menghasilkan anak didik bangsa yang cemerlang di persada antarabangsa.

Diyakini bahawa Kebawah Duli Yang Maha Mulia Tuanku Ismail Petra Ibni Almarhum Sultan Yahya Petra adalah alumni yang bakal memartabatkan lagi legasi UMS dalam memberikan inspirasi kepada seluruh mahasiswa, alumni malah seluruh rakyat tidak kira dari negeri mana mereka berasal, betapa pentingnya usaha-usaha memelihara keharmonian dan kestabilan serantau itu disokong dan diberikan kerjasama sepenuhnya. Kata kiasan, "*Serumpun bak serai, Seinduk bak manuk,*" dapat menggambarkan betapa pemimpin itu bukan hanya disembah dan dihormati, tetapi ianya juga adalah cerminan kualiti dan kredibiliti diri setiap individu itu.

Memetik kata-kata KDYMM Tuanku Al-Sultan Kelantan Darulnaim pada penghujung Ucapan Terima Kasih Baginda, "Beta mendoakan agar hubungan Negeri Beta, Kelantan, dan Negeri Sabah, akan

terus mekar, berkekalan selama-lamanya," cukup jelas menunjukkan betapa Ijazah Kehormat yang dianugerahkan kepada Baginda itu merupakan satu manifestasi simbolik kepada hubungan dua hala yang lebih akrab dan rapat pada masa hadapan di antara kedua-dua buah negeri yang terpisah oleh Laut China Selatan.